



Mandi a ducj, letôrs di Contecurte!

O varês viodût che la Ostarie, cul tacâ dal 2020, si è cjapade cualchi zornade di polse cu lis publicazions... E o scometin che cualchidun al si sarâ domandât... Parcèèèè? E magari cualchi canaie al varâ pensât che o sin dai sflaçjons. Cheste ultime robe, e je sigure une veretât, ma no sin stâts cu lis mans in man, soledut par chel che e rivuarde l'Ostîr e la Sartore.

L'Ostîr, profitant di vê finît lis contis frescjis, al à metût man al Camarin, une vore plen e disordenât, e al à tacât a rabaltâ fûr su dut e meti a puest l'archivi des contis. Un lavoron che al larâ indenant tai prossims dîs, ma che al à permetût di rivâ bielzâ a **cualchi risultât e scuvierte, sedi sul undicesin an di vite de nestre Ostarie**, nassude ai 16 di Zenâr dal 2009, sedi sul ultin an di contis e Spetacui.


Sêso curios? E alore **tachìn a dâ i numârs!**



La ultime conte publicade su la nestre Ostarie ai 31 di Dicembar e je la conte

numar 905! Di no crodi, vere? L'ostîr al à numerât une a une lis contis, e planc a planc, a partî dal 2009, al larà a meti il numar e a gjavâ un pôc di polvar, magari comedant la imagjin o cualchi falope dulà che i cole il voli. Us pues za dî, che l'andament des contis - tai undis agns di vite de osterie - al è chest:

- 2009: 95 contis di 25 autôrs diferents
- 2010: 56 contis di 20 autôrs diferents
- 2011: 48 contis di 18 autôrs diferents
- 2012: 61 contis di 17 autôrs diferents
- 2013: 65 contis di 18 autôrs diferents
- 2014: 84 contis di 17 autôrs diferents
- 2015: 110 contis di 19 autôrs diferents
- 2016: 131 contis di 30 autôrs diferents
- 2017: 63 contis di 16 autôrs diferents
- 2018: 64 contis di 21 autôrs diferents
- 2019: 128 contis di 32 autôrs diferents
- 2020: ?



Periodis di magre e di gjonde, insome, cun cualchi an dulà che e je stade cualchi polse plui lungje dal solit. Spes al è stât par i lavôrs di manutenzion, stant che o vin cambiât trê buteghis: Splinder e Blogspot, in afit di rive jù; e cumò o pain un afit regolâr e o sin parons di cjase nestre, achì su www.contecurte.eu.

Cualchi altre polse, magari, e je stade par i timps e lis lunis dal Ostîr, che o savês, nol è propit un che al è bon di stâ cuiet e nancje un tant facil di tirâ a ciment. Ma bisugne dî che la gjestion, cambiant come che al è normâl che al sedi, il personâl e il menù, e je stade simpri in fidance dal **prodot tipic che nus à sburtât a nassi: la CONTE CURTE**. Par chel, e i numars nus confuartin, o **confidin che il 2020 al sedi propit l'an che o rivin adore a meti sù LA CONTE NUMAR 1000!**

Ven a stâi, contecurtârs e contecurtaris, cumò che o sin di gnûf in vierzidure, daisi da fâ e vie, fasìn che il 2020 al sedi un an di abundance!



Ancje parcè, simpri lânt indenant a dâ i numar, us dîs che o vin publicât, cjacarant dome di contis, **la bielege di plui di 450.000 peraulis e cirche 2.200.000 batudis!** (plui o mancûl 15 libris luncs tant che **Bisest**)


Par cui che al à passion di numars, **la medie di contis publicadis a d'an e je di cirche 80 contis, par un numar di caratars di circa 2.400 par ogni conte (41.000 peraulis ogni an)**. L'ostîr al è ancjemò daûr a tamesâ il materiâl, ma i pâr za di podê afermâ che i gjenars plui doprâts a son chel **ironic** e chel che noaltris o vin tacât a clamâ **romantic** (che o intindin un pôc ce che in inglês si clame "*mainstream*", ven a stâi un spjeli vonde larc di sfumaduris. Avonde rapresentadis, ma o savin che e je colpe di ostîr e famei, la fete des contis di gjenar **fantastic**.

E come autôrs cemût sino? Ve chi, che o vin un pôcs di dâts di devant e daûr dal bancon! In chescj undis agns **o vin vût la bielege di 77 autôrs diferents** (su la cjarte) ancje se o vin di marcâ une presince avonde gruesse di autôrs che o savin no jessi personis esistentis ma pseudonims e che par solit a mandin dome une o dôs contis e dopo a sparissin tal inniò. (Anzit, chest vergognâsi di meti il non o sielzi un biel sorenon cence platâ cui che si è, al sarès dut di studiâ) A gjavâ chei li, che a son une grampade, **o sin in ogni câs sui 70 autôrs**, che nus somee un numar di no butâ vie, stant trop che al è stitic il mont di cui che al scrîf par furlan.

I numars dal top contadôrs, invezit, a marchin doi di lôr che a àn di scugnî sei lassù par lavôr, che a son il Famei, **Checo Tam, cun 87 contis, e l'Ostîr, cun 85**. Ma daûr no di masse al è **Nello Malisan**, che a nus plâs pensâ che al sedi diventât un scritôr di contis seriâl par cause nestre. Nello al à ofrît la bielege di 74 contis, contant ancje chês scritis a miezis cun altris. E subit daûr a son altris che o vin di dîsi dome graciis pe costance e dedizion che a àn dediât al nestri progjet: **Pauli Jacuz e Galliano di Buenos Aires**, cuntune biege 50ine di contis, **Jaio Furlanâr (46), Barbara Battel (45), Laurin Zuan Nardin (40) e Bepi Zefon (31)**.

A zirin ator de ventine di contis, altris come *Plume di Ingjustri (20)*, *Luciano Marinig (20)* il

Passadôr (19), *Milio dai cjans* (19), *Massim Furlan* (18), *el fari* (16) e in grazie de ativitât dal Ostîr tes scuelis o vin ancje **16 contis scritis di fruts**.

Discors che nus puarte dentri tal cantin des dificoltât de Ostarie. La prime e je propite  chê di **no rivâ a tirâ dentri int zovine che e scrivi**. Lu savin che la colpe no je nestre, parcè che intun popul dulà che une lenghe no ven insegnade ni di gjenitôrs, ni de scuele, nol sarà sigure un sît internet a cambiâ lis robis e a fâ scrivi intune lenghe di pôcs. Ma o cjapin at de **etât medie alte dai nestri contecurtârs** e cirarin di fâ alc.

Altri cantîn che nol ingrane, in ostarie, al è chel dai **coments**, che a son simpri pôcs e che no corispuindin a lis leturis. Achì, forsit, no si pues nancje viodilu come probleme, tal sens che un che al lei une conte nol à masse ce scrivi e insome... al è come un che al bêt un tai, che nol à mica di scugnî dî cemût che al è. **Al sarès però biel che si rivàs a sparniçâ di plui il verp de conte curte**, magari condividint su fb lis contis, robe che, ogni tant, no fasìn nancje nô di Contecurte cu lis nestris contis. Ma i furlans no àn timp, lu savìn, no si pues fâi une colpe. **Il top comentadôr, in ogni câs, al è Lussian di Varian**, che al è un plasê viodi il sô coment rivâ puntuâl e delicât a ogni conte.

Altri? Sì!

Il 2019 al è stât un an di grazie. O vin publicadis tantissimis contis e soledut di tancj autôrs diferents e cun ben 7 autôrs gnûfs (4 feminis e trê oms). Ma no dome chês: o vin publicât **conseis di scriture** e cualchi consei di leture cun i **Lets in ostarie** e soledut al è stât l'an dai **Spetacui**. Mai come tal 2019 si sin impegnâts a **puartâ ator lis contis dal virtuâl al reâl**, cun spetacui simpri plui in teme e strukturâts (la *Briscule des Striis*, la *Disfide dai Dadui*, la *Briscule dai Sants*, il *Conte Curte day "dîs dîs dîs" ...*).

Par chel o vin par voaltris une altre gnove. La nestre Sartorie e à cjapât in man dut il materiâl dai Spetacui di Contecurte e e sta metint adun **une maraveose gnove pagine cun dentri une vore di materiâl di podê cjatâ, lei e scjamâ**. E ta chê gnove pagine o cjatarês za la date dal prossim Contecurte Day... scjaldait lis tastieris!

☒ Finide chi?

Ma no! O vin ben altris ideis che nus passin pal cjâf. Une e je chê di cjatâ une altre maniere par coinvolzi i contecurtârs a scrivi su comission. L'an passât e je stade **la cjatade dai dadui des contis, che dopo, in version contecurtiche, si son mudâts in Cjarticontis.**

Chest an **o vin voie di cjatâ alc altri par stiçâ a scrivi e invidâ te Ostarie.** Da rest, un locâl che nol fâs marketing nol pues vê masse sucès.

E cun di plui, l'Ostîr, in combute cu la Sartore e cu la Coghe, al à voie di fâsi lavorâ di bessôl e **regalâ alc ogni mês ai contecurtârs plui fidâts e ai clients plui afezionâts...** Insome, stait in vuaite che in curt o varin plui di cualchi gnove.

E no vin finît! Di doman o tachin lis publicazions e ce fasino? **O vin metût a puest ancje la cantine,** gjavât lis telis di rai e cjatât scjatulis che no savevin nancje di vê. A jerin contis metudis in bande, une volte, ma cumò a deventaràn contis di meti sù! E fra di chês o podìn anticipâ che **o vin cjatât une grampade di contis dal nestri Famei,** che lui nus veve mandadis di riserve (*President Reserve Riccadonna*, come che nus dîs lui) e ancje **une grampe di Storiutis de buinegnot, che cualchidun si visarà, a son di Ivano Urli** e che nus à dât il permès di doprâ. Ven a stâi che ogni fin setemane, par cualchi setemane, o varin chestis contutis. La sabide par visâ che il famei al è in radio, su **Radio Onde Furlane**, cu la sô **Indigo**; la domenie par saludâ la setemane cuntune contute de buinegnot.

Al è vonde, o disarès. Se o sês pronts par un super an contecurtic, **lassait un coment che o vin gust di sintîus!**